



Juma la Kwanza la Dunia

Maana, kwa siku sita Bwana alifanya mbingu, na nchi, na bahari, na vyote vilivyomo, akastarehe siku ya saba; kwa hiyo Bwana akaibarikia siku ya Sabato akaitakasa. — **Kutoka 20:11.**

Mzunguko wa kila juma wa siku saba halisi, sita kwa kazi, na ya saba kwa kupumzika, ambao umetunzwa na kuletwa kupitia historia ya Biblia, ulianzia kwa ukweli muhimu wa siku saba za kwanza.

Mungu alipoitamka sheria Yake kwa sauti inayosikika kutoka Sinai, alianzisha Sabato kwa kusema, "Ikumbuke siku ya Sabato uitakase." Kisha alitangaza kwa uwazi kitu gani yapasa kifanyike katika siku sita, na nini kisifanyike katika siku ya saba. Kisha, kwa kutoa sababu ya kuadhimisha juma kwa namna hiyo, alirejelea mfano Wake katika siku saba za kwanza katika wakati. "Maana, kwa siku sita Bwana alifanya mbingu, na nchi, na bahari, na vyote vilivyomo, akastarehe siku ya saba; kwa hiyo Bwana akaibarikia siku ya Sabato akaitakasa."

Sababu hii inaonekana nzuri na yenye nguvu tunapoelewa kwamba rekodi ya Uumbaji inamaanisha siku halisi. Siku sita za kwanza za kila juma amepewa mwanadamu afanye kazi, kwa sababu Mungu alitumia kipindi hicho hicho cha juma la kwanza katika kazi ya uumbaji. Siku ya saba Mungu amehifadhi kama siku ya mapumziko, kwa kukumbuka mapumziko Yake katika kipindi hicho hicho baada ya Yeye kufanya kazi ya uumbaji kwa siku sita.

Lakini dhana ya wasioamini, kwamba matukio ya juma la kwanza yalihitaji vipindi vya muda mrefu usiojulikana kwa ajili ya ukamilishwaji wake, inaathiri moja kwa moja msingi wa Sabato ya amri ya nne. Inafanya jambo lile ambalo Mungu amelifanya liwe wazi sana kuwa jambo lisilo dhahiri na lisioeleweka.

Wanajiolojia wasioamini wanadai kwamba dunia ni ya zamani sana kuliko rekodi ya Biblia inavyosema. Wanaikataa rekodi ya Biblia, kwa sababu ya mambo ambayo kwao ni ushahidi kutoka kwa dunia yenyewe, kwamba dunia imekuwepo miaka makumi elfu. Na wengi wanaojidai kuwa wanaamini rekodi ya Biblia wanashindwa kuelezea mambo ya ajabu yanayopatikana duniani, yaoneshayo mtazamo kwamba juma la Uumbaji lilikuwa siku saba halisi tu, na dunia sasa ina miaka kama 6000 tu...

Bila historia ya Biblia, jiolojia haiwezi kuthibitisha chochote. Masalio yaliyopatikana duniani yanaonesha hali ya mambo inayotofautiana kwa kiasi kikubwa na ya sasa. Lakini muda wa kuwepo kwake, na kipindi gani vitu hivi vimekuwepo duniani, vinaweza kueleweka tu kwa kutumia historia ya Biblia... Watu wanapoacha Neno la Mungu kuhusiana na historia ya Uumbaji, na kujaribu kuelezea kazi za uumbaji za Mungu kwa kanuni za asili, wapo kwenye bahari ya mashaka isiyo mipaka. Jinsi Mungu alivyofanikisha kazi ya Uumbaji kwa siku sita halisi hajawahi kufunua hilo kwa wanadamu wenye ukomo. Kazi Zake za uumbaji ni ngumu kueleweka kama kulivyo kuwepo Kwake (Spiritual Gifts 3:90-93).